

Na osnovu člana 104. Statuta općine Ilijaš ('Službene novine Kantona Sarajevo' br. 20/09-prečišćeni tekst i 46/18), te člana 90. Poslovnika o radu Općinskog vijeća Ilijaš ('Službene novine Kantona Sarajevo' br. 19/22), Općinsko vijeće Ilijaš na svojoj 32. sjednici održanoj 21.11.2023. godine, donijelo je :

ZAKLJUČAK

Član 1.

Prihvata se Nacrt Odluke o izvršavanju Budžeta općine Ilijaš za 2024. godinu i stavlja na javnu raspravu.

Član 2.

Nacrt Odluke o izvršavanju Budžeta općine Ilijaš za 2024. godinu stavlja se na javnu raspravu, kako slijedi :

- objavom putem web strane općine Ilijaš
- objavom na oglasnoj ploči općine Ilijaš
- javnom prezentacijom i raspravom u sali Općinskog vijeća

U javnoj raspravi učestvovat će : građani, javna preduzeća, javne ustanove, mjesne zajednice, budžetski korisnici, političke stranke i ostale asocijacije i udruženja građana.

Član 3.

Javna rasprava o Nacrtu Odluke o izvršavanju Budžeta općine Ilijaš za 2024. godinu. se određuje u trajanju od 15 dana, počev od 22.11.2023. godine do 06.12.2023. godine.

Član 4.

Nakon provedene javne rasprave primjedbe i prijedloge će se dostaviti Službi za privredu i finansije u pisanoj formi ili putem e-maila, najkasnije do 08.12.2023. godine - 12,00 sati.

Primjedbe i prijedlozi dostavljeni poslije navedenog roka neće biti uzeti u razmatranje.

Član 5.

Ovaj Zaključak stupa na snagu danom donošenja.

Broj: 01 / 1 - 02 - 2725-6/23
Ilijaš , 21.11.2023.godine



Predsjedavajuća
Općinskog vijeća Ilijaš

Alma Mešić, BA nov.

Na osnovu člana 7. stav 2. Zakona o budžetima u Federaciji BiH ('Službene novine Federacije BiH' br. 102/13, 9/14, 13/14, 8/15, 91/15, 102/15, 104/16, 5/18, 11/19, 99/19 i 25a/22), člana 13. Zakona o principima lokalne samouprave u Federaciji BiH („Službene novine Federacije BiH“ br. 49/06 i 51/09), člana 55. i 104. Statuta općine Ilijaš ('Službene novine Kantona Sarajevo' br. 20/09—prečišćeni tekst i 46/18), te člana 90. i 94. Poslovnika o radu Općinskog vijeća Ilijaš ('Službene novine Kantona Sarajevo' br. 19/22), Općinsko vijeće Ilijaš na svojoj __. sjednici održanoj __. __.2023. godine, donijelo je :

O D L U K A

o izvršavanju Budžeta općine Ilijaš za 2024. godinu

I OPĆE ODREDBE

Član 1.

Ovom odlukom utvrđuje se forma i struktura prihoda i primitaka, rashoda i izdataka Budžeta općine Ilijaš za 2024. godinu (u daljem tekstu : Budžeta), način njegovog izvršavanja, upravljanje prihodima i primitcima te rashodima i izdacima Budžeta, prioritet plaćanja, finansijsko izvještavanje, revizija i kontrola Budžeta, obim zaduživanja i izdavanja garancija, ovlaštenja Općinskog načelnika, te prava i obaveze korisnika budžetskih sredstava u izvršavanju Budžeta, kazne za neispunjene obaveza i druga pitanja vezana za izvršavanje Budžeta u tekućoj godini.

Član 2.

Budžet je procjena godišnjih prihoda i primitaka, te utvrđenih iznosa rashoda, izdataka i finansiranja Općine te kroz projekte raspoređene u tekuće i kapitalne programe, koji donosi Općinsko vijeće.

Budžet se donosi za fiskalnu 2024. godinu, odnosno za period od 01. januara do 31. decembra 2024. godine, a programski dio obuhvata procjenu za fiskalnu godinu i projekcije za naredne dvije godine.

Ukoliko Općinsko vijeće ne donese Budžet za narednu godinu do kraja tekuće godine, Općinsko vijeće donosi Odluku o privremenom finansiranju.

Član 3.

Svi prihodi i primici, rashodi i izdaci iskazuju se u Budžetu prema bruto principu.

Budžet mora biti uravnotežen tako da ukupni prihodi i primici pokrivaju ukupne rashode i izdatke.

Obaveze na teret Budžeta tekuće godine mogu se preuzimati samo za namjene i do visine utvrđene u posebnom dijelu Budžeta, ako su za to ispunjeni svi zakonom, ovom odlukom i drugim propisima utvrđeni uslovi.

Član 4.

Prijedlozi odluka i drugih propisa i akti koje donosi Općinsko vijeće ukoliko podrazumjevaju povećavanje ili smanjivanje prihoda ili povećanje rashoda, u okviru obrazloženja moraju sadržavati i obrazloženje fiskalne procjene posljedica na budžet iz koje se mora vidjeti povećavaju li se ili smanjuju prihodi ili rashodi budžeta.

II SADRŽAJ BUDŽETA

Član 5.

Budžet se sastoji od općeg i posebnog dijela.

Opći dio Budžeta čini Račun prihoda, kapitalnih primitaka i finansiranja i Račun rashoda, kapitalnih izdataka i finansiranja na nivou ukupnog Budžeta.

U Računu prihoda, kapitalnih primitaka i finansiranja iskazuju se porezni i neporezni prihodi, kao i drugi prihodi i primici i neutrošeni prihodi budžeta iz 2023.godine razvrstani po ekonomskoj i fondovskoj klasifikaciji.

Namjenske donacije i transferi koji nisu planirani u budžetu a ostvare se u toku godine postaju sastavni dio budžeta na osnovu Odluke Općinskog načelnika o priznavanju i unosu sredstva odnosno raspodjeli sredstava, kojom se javno definiše pozicija za knjiženje i utrošak ostvarenog prihoda.

Posebni dio Budžeta sastoji se od plana rashoda i izdataka budžetskih korisnika Općine Ilijaš a u skladu sa Registrom budžetskih korisnika Općine Ilijaš za 2024. godinu (Službene novine Kantona Sarajevo br. 10/23), iskazanog po programskoj klasifikaciji te ekonomskoj i fondovskoj klasifikaciji, te zbirnog pregleda budžetskih izdataka po funkcionalnoj klasifikaciji.

Do početka primjene odredbi Zakona o budžetima na gradove i općine koji se odnosi na programsko budžetiranje, programska klasifikacija Budžeta se bazira na programima/mjerama definisanim u Dokumentu okvirnog budžeta Općine Ilijaš za period 2024.-2026. godina, usaglašenim sa Strategijom razvoja Općine Ilijaš za period 2021.-2027. godine.

Član 6.

Svi javni prihodi i primici Budžeta, uključujući i prihoda koje budžetski korisnici ostvaruju obavljanjem osnovne djelatnosti po posebnim propisima, uplaćuju se na depozitni račun i iskazuje po izvorima iz kojih potiču.

Platni promet vrši se putem jedinstvenog računa trezora Općine Ilijaš, odnosno putem depozitnog i više transakcijskih računa otvorenih kod ovlaštenih organizacija platnog prometa.

Član 7.

Priznavanje prihoda i primitaka, te rashoda i izdataka putem sistema Glavne knjige provodi se po načelu modificiranog nastanka događaja.

Prihodi se priznaju u onom periodu kada su mjerljivi i raspoloživi, to jest kada su uplaćeni na račun, a primici ako je izvjesno da će biti naplaćeni u obračunskom periodu.

Rashodi i izdaci priznaju se u onom periodu kada je obaveza nastala.

II IZVRŠAVANJE BUDŽETA

Član 8.

Budžetski korisnik je Općina Ilijaš.

U okviru budžetskog korisnika rashodi i izdaci razvrstani su po organizacijskoj strukturi.

Budžetski korisnik može koristiti sredstva budžeta u skladu sa svojim finansijskim planom samo do visine utvrđene namjene u posebnom dijelu Budžeta.

Član 9.

Služba za privredu i finansije nadležna je za izradu kvartalnih operativnih planova, kojima se predviđa priliv i odliv sredstava za JRT, a koji predstavljaju osnov za izvršavanje budžeta.

U skladu sa operativnim planom i raspoloživim sredstvima, na osnovu zahtjeva organa i službi vrši se rezervacija sredstava za realizaciju projekata i izmirenje obaveza.

Član 10.

Općinski načelnik u skladu sa zakonskim propisima izvršava Budžet Općine.

Svaki utrošak sredstava Budžeta mora biti odobren od Općinskog načelnika ili lica koje ovlasti Općinski načelnik.

Općinski načelnik je dužan svake godine za prethodnu budžetsku godinu za period u kojem je obavljao poslove Općinskog načelnika popuniti Izjavu o fiskalnoj odgovornosti.

Član 11.

Budžet se izvršava u skladu sa njegovim likvidnim mogućnostima i po sljedećim prioritetima:

a) Sredstva za rad budžetskih korisnika

1. Otplata duga i kamata
2. Plaće
3. Obaveze za materijal i druge troškove za rad budžetskih korisnika
4. Naknade po sudskim presudama
5. Naknade za rad vijećnika i radnih tijela u Općinskom vijeću
6. Naknade zaposlenih
7. Tekući transferi
8. Ostalo

b) Namjenska sredstva

1. Ugovorene obaveze i završetak započelih projekata
2. Tekući poslovi na održavanju objekata komunalne i druge infrastrukture
3. Investiciono održavanje objekata
4. Novi kapitalni projekti
5. Grantovi drugim nivoima Vlade
6. Ostalo

Član 12.

Budžetski korisnik je dužan u izvršenju Budžeta uskladiti dinamiku realizacije obaveza po Budžetu sa dinamikom priliva i odliva sredstava.

Izuzetno ako u toku godine zbog nastanka novih obaveza dođe do povećanja rashoda ili se smanje prihodi može se donijeti odluka o obustavljanju izvršavanja pojedinih rashoda ili izdataka u trajanju od 45. dana. Odluku donosi Općinski načelnik.

Mjerama privremenog obustavljanja izvršenja budžeta Općinski načelnik može :

1. Zaustaviti preuzimanje obaveza i/ili ;
2. Predložiti produženje ugovorenih rokova plaćanja i/ili ;
3. Zaustaviti preraspodjelu budžetskih sredstava potrebnu radi preuzimanja obaveza ;

Član 13.

Ako mjere iz člana 12. stav 2. ne daju rezultate pokreće se postupak Izmjena i dopuna Budžeta.

Ako se tokom godine zbog izvanrednih prilika i potreba povećaju izdaci ili smanje prihodi ili primici, Budžet se mora uravnotežiti sniženjem planiranih izdataka ili pronalaženjem novih

prihoda. Pored toga ako prihodi značajno porastu Općinski načelnik može odlučiti da se započne sa postupcima Izmjena i dopuna Budžeta.

Uravnoteženje se provodi putem Izmjena i dopuna Budžeta po postupku i proceduri za donošenje Budžeta. Izmjene i dopune Budžeta donese se po postupku i proceduri jednog čitanja.

Član 14.

Pomoćnici Općinskog načelnika su odgovorni za potpunu i pravovremenu naplatu prihoda i primitaka iz svoje nadležnosti i dužni su provesti sve zakonom propisane radnje radi naplate potraživanja iz svoje nadležnosti.

U slučaju da su potrebna eventualna izdvajanja sredstava iz budžeta po sudskoj presudi nadležna služba obavještava i podnosi zahtjev sa konkretnom instrukcijom Službi za privredu i finansije za rezervaciju potrebnih sredstava.

Pomoćnici Općinskog načelnika i Sekretar Općinskog vijeća kao nosioci realizacije odobrenih programa i aktivnosti iz svoje nadležnosti odgovorni su za zakonito izvršavanje svih rashoda i izdataka u skladu sa utvrđenom namjenom.

Programi i aktivnosti koji sa sobom nose trošenje budžetskih sredstava i zaključivanje dužničko-povjerilačkih odnosa ne mogu biti pokrenuti bez prethodne saglasnosti i rezervisanja sredstava od strane Službe za privredu i finansije.

Odgovorna lica koja u skladu sa utvrđenom procedurom prate realizaciju ugovorenih obaveza svojim potpisom knjigovodstvene isprave potvrđuju da su izvršili provjeru pravnog osnova, te utvrđenu visinu obaveze koja iz nje proizilazi, te da su saglasni sa izmirenjem obaveze.

Član 15.

Općinski načelnik na prijedlog Službe za privredu i finansije, može donijeti Odluku o prestrukturiranju rashoda u okviru ukupnog iznosa odobrenog za budžetskog korisnika, najviše do 10 % ukupno odobrenih rashoda i izdataka za budžetskog korisnika.

U okviru odobrenog Budžeta, preraspodjela sredstava unutar budžetskog korisnika za iste kategorije rashoda neograničeno je dozvoljena.

Član 16.

Sredstva utvrđena u Budžetu - ekonomski kod 611000 – Bruto plaće i naknade zaposlenih i 612000 – Doprinosi poslodavca realizovat će se u skladu sa Odlukom o plaćama i naknadama u organu uprave Općine Ilijaš, a u skladu sa zakonskim propisima, podzakonskim i internim aktima općine Ilijaš.

Osnovica za obračun plaće se utvrđuje sporazumom između Općinskog načelnika i predstavnika sindikata, a u skladu sa odredbama člana 5. Stav 3. Zakona o plaćama i naknadama u organima vlasti Federacije BiH i projekcijom Budžeta za 2024.godinu i iznosi 385,00 KM a visina boda 1,07.

Član 17.

Sredstva utvrđena u Budžetu – ekonomski kod 613000 – Izdaci za materijal, sitni inventar i usluge raspoređuje Općinski načelnik shodno operativnom planu budžetskog korisnika, a na osnovu zaključaka, ugovora, protokola ili sporazuma, odnosno ugovora za izvođenje radova, usluga i nabavke opreme.

Član 18.

Sredstva utvrđena u Budžetu – ekonomski kod 613970 – Izdaci po osnovu drugih samostalnih djelatnosti i povremenog rada realizuju se na sljedeći način :

- Naknade zastupnicima i komisijama Općinskog vijeća isplaćivat će se shodno Odluci o visini naknade vijećnicima, članovima stalnih i povremenih radnih tijela Općinskog vijeća Ilijaš, na bazi mjesečnih obračuna koje sastavlja Sekretar Općinskog vijeća.
- Naknada članovima i sekretaru Općinske izborne komisije isplaćuje se mjesečno shodno Odluci o visini naknade za rad članova izborne komisije osnovne izborne jedinice u BiH;
- Naknada za članove savjeta MZ isplaćivat će se shodno mjesečnom obračunu koji sastavlja Pomoćnik načelnika za društvene djelatnosti i poslove mjesnih zajednica, a u skladu sa Odlukom o visini naknade za rad članova Savjeta mjesnih zajednica Općine Ilijaš ;
- Naknade za volonterski rad po osnovu ugovora o volontiranju isplaćuju se na način i u skladu sa Ugovorom o volontiranju u visini naknada za topli obrok i troškove prijevoza uposlenika ;
- Naknade za jedinicu i članove štaba CZ isplaćivat će se shodno mjesečnom obračunu koji sastavlja Pomoćnik načelnika za civilnu zaštitu, a u skladu sa zaključkom Općinskog načelnika kojima se reguliše visina naknade i način obračuna ;
- Naknade za članove komisije tehničkog pregleda objekata isplaćuju se u skladu sa rješenjem donesenim od strane Službe za prostorno uređenje i zaštitu okoliša ;
- Naknade za rad komisija organa uprave isplaćuju se u skladu sa rješenjima donesenim od strane Općinskog načelnika ;
- Naknade za privremeni i povremeni samostalni rad isplaćuju se u skladu sa Ugovorima sklopljenim između nosioca posla i Općinskog načelnika ;

Član 19.

Sredstva utvrđena u Budžetu na poziciji 614100 – Tekući transferi drugim nivoima vlasti realizuju se na sljedeći način :

- Transfer za izbore, transferiše se u skladu sa zahtjevom Općinske izborne komisije za pokrivanje administrativnih i drugih troškova provođenja Općih i lokalnih izbora te izbora za organe mjesnih zajednica
- Transfer za JU KSC i Radio Ilijaš, transferiše se u principu mjesečno u visini do 1/12 plana.
- Transfer za JU KSC i Radio Ilijaš-transfer Zavičajni muzej, transferiše se u skladu sa potpisanim Sporazumom,
- Transfer za Pravobranilaštvo Kantona Sarajevo, transferišu se u principu mjesečno u visini do 1/12 plana, a u skladu sa potpisanim Sporazumom,
- Transfer za manifestaciju „Ilijaški Dani“ transferiše se u skladu sa Planom i programom Organizacionog odbora manifestacije i Odlukom Općinskog načelnika,
- Transfer za Memorijalni centar Srebrenica-Potočari, transferisat će se na način i u skladu sa potpisanim Memorandumom između Općine Ilijaš i Memorijalnog centra Srebrenica-Potočari,
- Transfer za nabavku školskog pribora za učenike prvih razreda, transferisat će se u skladu i na način sa potpisanim Ugovorom o nabavci i isporuci,
- Transferi za osnovne i srednje škole, svojom odlukom odobrava Općinski načelnik, na prijedlog Službe za društvene djelatnosti i poslove mjesnih zajednica. Sa korisnicima odobrenih sredstava sklopit će se ugovor o finansiranju-sufinansiranju odabranih projekata, kojim se korisnici sredstava obavezuju da dostave izvještaj (narativni i finansijski) o utrošku odobrenih sredstava ;

- Transfer za JU OMBŠ Sarajevo – područno odjeljenje Ilijaš, transferiše se u principu kvartalno, a u skladu sa potpisanim Sporazumom ;
- Transfer za učešće u projektima razvoja turističke infrastrukture transferisat će se u skladu sa Odlukom donesenom od strane Općinskog načelnika i potpisanim Sporazumom ;
- Transfer za učešće u projektima zaštite okoline transferisat će se u skladu sa Odlukom donesenom od strane Općinskog načelnika i potpisanim Sporazumom ;
- Transfer za Fond Memorijala Kantona Sarajevo transferisat će se u skladu sa Odlukom donesenom od strane Općinskog načelnika i potpisanim Sporazumom ;
- Tekući transfer za prevenciju maloljetničke delikvencije odobrava se na prijedlog Službe za opću upravu, boračko invalidsku i socijalnu zaštitu a u skladu sa Odlukom Općinskog načelnika

Član 20.

Sredstva utvrđena u Budžetu na poziciji 614200 – Tekući transferi pojedincima realizuju se na sljedeći način :

- Novčane pomoći licima u stanju socijalne potrebe i teškog imovnog stanja isplaćivat će se na osnovu Odluke o odobravanju i isplati jednokratne novčane pomoći osobama u stanju socijalne potrebe, na bazi odluka odobrenih od strane Općinskog načelnika, a na prijedlog Komisije za zdravstvo, informisanje, socijalna i vjerska pitanja Općinskog vijeća po kriterijima utvrđenim odlukom Općinskog vijeća.
- Novčane pomoći teško oboljelim licima na ime liječenja isplaćivat će se na osnovu Odluke o odobravanju novčane pomoći za liječenje, na bazi odluke odobrene od strane Općinskog načelnika, a na prijedlog Komisije za rješavanje zahtjeva za dodjelu novčane pomoći teško oboljelih lica sa područja općine Ilijaš imenovane od strane Općinskog načelnika a u skladu sa Odlukom o uslovima, kriterijima i načinu dodjele novčane pomoći u pricipiranju liječenja teško oboljelih lica sa područja Općine Ilijaš
- Novčane pomoći licima u stanju socijalne potrebe i teškog imovnog stanja –troškovi smještaja isplaćivat će se na ime troškova privremenog smještaja, na osnovu pojedinačnih odluka i prijedloga od strane Pomoćnika načelnika za saobraćaj, stambeno komunalne poslove i građenje, a u skladu sa zaključkom Općinskog načelnika koji reguliše ovu oblast.
- Novčane naknade prema boračkoj populaciji - paraplegičarima-ratnim vojnim invalidima sa mjestom stanovanja na području općine Ilijaš, isplaćuje se na osnovu rješenja Službe za opću upravu, boračko invalidsku i socijalnu zaštitu kojim se utvrđuje status paraplegičara, u pojedinačnoj visini do 200,00 KM mjesečno.
- Zdravstvena zaštita marginaliziranih lica i lica u stanju socijalne potrebe, uplaćivat će se licima u stanju socijalne potrebe sa mjestom stanovanja na području općine Ilijaš na osnovu rješenja Službe za opću upravu, boračko invalidsku i socijalnu zaštitu kojim se utvrđuje obaveza uplate u visini 20,00 KM mjesečno na ime zdravstvenog osiguranja na ime nosioca prava po ovom osnovu.
- Novčane pomoći – mjere natalitetne politike i porodica sa 3 i više djece isplaćiva će se na osnovu pojedinačnih rješenja donesenih od strane Pomoćnika načelnika za opću upravu, boračko invalidsku i socijalnu zaštitu a u skladu sa Odlukom o uslovima, kriterijima i načinu dodjele jednokratne novčane donesene od strane Općinskog načelnika
- Naknade na ime pogrebnih troškova prema boračkoj populaciji (vojni invalidi, ranjeni borci i porodice poginulih) isplaćivat će se na osnovu pojedinačnih rješenja donesenih od strane Pomoćnika načelnika za opću upravu, boračko invalidsku i socijalnu zaštitu.
- Podrška marginaliziranim grupama stanovništva – projekti ekomske osnaživanja isplaćivat će se u skladu sa potpisanim Sporazumom između Općine Ilijaš i donatora.

- Stipendiranje i nagrađivanje učenika i studenata isplaćivat će se mjesečno na osnovu Plana Općinskog vijeća o stipendiranju učenika i studenata i Ugovora o stipendiranju potpisanih sa korisnikom stipendije,
- Podrška školovanju djece sa poteškoćama u razvoju isplaćivat će se na bazi pojedinačnih odluka odobrenih od strane Općinskog načelnika po kriterijima utvrđenim odlukom Općinskog vijeća.
- Transfer za mobilnost mladi isplaćivat će se na bazi Odluke donesene od strane Općinskog načelnika a u skladu sa Pravilnikom o uvjetima, načinu i postupku dodjele sredstava iz transfera za mobilnost mladih donesenom od strane Općinskog vijeća,
- Podrška start up biznisima za sufinansiranje ekonomskih mjera realizovat će se na osnovu Odluke Općinskog načelnika i potpisanog ugovora između Općinskog načelnika i korisnika subvencije ;

Član 21.

Sredstva Posebne naknade za zaštitu i spašavanje od prirodnih i drugih nesreća odobrava Općinski načelnik na osnovu Plana korištenja sredstava posebne naknade za zaštitu i spašavanje od prirodnih i drugih nesreća općine Ilijaš za 2024. godinu kojeg donosi Pomoćnik načelnika Civilne zaštite, u skladu sa Odlukom o uslovima i načinu korištenja sredstava ostvarenih po osnovu posebne naknade za zaštitu i spašavanje od prirodnih i drugih nesreća.

Sredstva po osnovu Naknade za izgradnju i održavanje javnih skloništa odobrava Općinski načelnik na osnovu Plana korištenja sredstava naknade za izgradnju i održavanje skloništa na području općine Ilijaš za 2024. godinu kojeg donosi Pomoćnik načelnika Civilne zaštite.

Član 22.

Sredstva utvrđena u Budžetu na poziciji 614300 – Tekući transferi neprofitnim organizacijama realizuju se na sljedeći način : :

- Transfer parlamentarnim klubovima OV-a – način izvršenja kao i raspored ovih sredstva izvršit će se na osnovu Odluke o finansiranju parlamentarnih grupa, koja je donesena od strane Općinskog vijeće, i odobrenim obračunom od strane Službe za privredu i finansije i Sekretara Općinskog vijeća ;
- Tekući transfer za podršku DVD Srednje za aktivnosti zaštite i spašavanja od požara na području Općine Ilijaš odobrava se na prijedlog Službe za civilnu zaštitu a u skladu sa Odlukom Općinskog načelnika ;
- Tekući transfer za vjerske zajednice transferiše se u skladu sa potpisanim Ugovorom a na prijedlog Službe za društvene djelatnosti i poslove mjesnih zajednica ;

Član 23.

Sredstva utvrđena u Budžetu na poziciji 614400 – Subvencije javnim preduzećima realizuju se na osnovu potpisanih Sporazuma i Ugovora.

Sredstva utvrđena u Budžetu na poziciji 614500 – Subvencije privatnim preduzećima i poduzetnicima realizuju se na sljedeći način :

- Podsticaj poljoprivrednoj proizvodnji – realizovat će se na osnovu Odluke o novčanim podrškama u poljoprivrednoj proizvodnji na području općine Ilijaš za 2024. godinu, koju donosi Općinsko vijeće.

Sredstva utvrđena u Budžetu na poziciji 614700 – Transferi međunarodnim organizacijama realizuju se na sljedeći način :

- Sufinansiranje EU i drugih projekata sa međunarodnim organizacijama realizovat će se na osnovu Odluke Općinskog načelnika i potpisanog Ugovora/Sporazuma ;

Član 24.

Sredstva za realizaciju tekućih transfera neprofitnim organizacijama mogu se realizovati jednokratno, mjesečno, tromjesečno ili polugodišnje, u jednakim ratama, zavisno od dinamike priliva budžetskih sredstava.

- Tekući transfer za Općinske organizacije : Crveni križa, Narodna kuhinja, MDD Merhamet, UG Penzioneri i UG „Budi mi drug“ transferišu se u principu mjesečno u visini do 1/12 plana, a u skladu sa potpisanim sporazumima o finansiranju odobrenih od strane Općinskog načelnika uz konsultaciju sa Službom za opću upravu, boračko invalidsku i socijalnu zaštitu. Kontrolu utroška odobrenih sredstava mjesečno će vršiti Služba za opću upravu, boračko invalidsku i socijalnu zaštitu u saradnji sa Službom za privredu i finansije.
- Tekući transfer za SOS Dječija sela BiH transferista će se u skladu sa Odlukom Općinskog načelnika i potpisanim Sporazumom ;
- Tekući transferi za redovan rad i aplikacije programa boračkih udruženja rasporedit će se na osnovu godišnje odluke Općinskog načelnika, koju će predložiti Komisija imenovana od strane Općinskog načelnika, a u skladu sa provedenom konkursnom procedurom za odabir korisnika sredstva iz budžeta.
- Tekući transferi za finansiranje javnog interesa općine Ilijaš u oblasti sporta-aplikacije programa (redovne aktivnosti) vršit će se na osnovu Pravilnika o kriterijima za finansiranje javnog interesa općine Ilijaš u oblasti sporta, a raspored sredstava će se vršiti na osnovu godišnje odluke Općinskog načelnika, koju će predložiti Komisija imenovana od strane Općinskog načelnika, uz konsultacije sa nadležnom službom a u skladu sa provedenom konkursnom procedurom za odabir korisnika sredstva iz budžeta
- Tekući transfer za kulturu odobravaju se na osnovu programskih zahtjeva, a na osnovu godišnje odluke Općinskog načelnika koju će predložiti Komisija imenovana od strane Općinskog načelnika, uz konsultacije sa nadležnom službom, a u skladu sa provedenom konkursnom procedurom za odabir korisnika sredstva iz budžeta.
- Tekući transfer za mlade odobravaju se odobravaju se na osnovu programskih zahtjeva, a na osnovu godišnje odluke Općinskog načelnika koju će predložiti Komisija imenovana od strane Općinskog načelnika uz konsultacije sa nadležnom službom, a u skladu sa provedenom konkursnom procedurom za odabir korisnika sredstva iz budžeta.
- Tekući transfer za program pružanje pravne i druge pomoći optuženim pripadnici ARBiH, transferisat će se u korist računa „Udruženje demobilisanih branilaca odbrambeno oslobodilačkog rata 1992.1995 – Općinska organizacija Ilijaš“ na osnovu pojedinačnih odobrenja od strane Općinskog načelnika uz konsultaciju sa Službom za opću upravu, boračko invalidsku i socijalnu zaštitu. Kontrolu utroška odobrenih sredstava periodično će vršiti Služba za opću upravu, boračko invalidsku i socijalnu zaštitu u saradnji sa Službom za privredu i finansije.
- Tekući transfer za ostale organizacije (nevladinom sektoru) odobrava se na osnovu programskih pojedinačnih zahtjeva koje odobrava Općinski načelnik, uz konsultacije sa nadležnom službom. Sa korisnicima odobrenih sredstava sklopit će se ugovor o finansiranju-sufinansiranju odabranih projekata, kojim se korisnici sredstava obavezuju da dostave izvještaj (narativni i finansijski) o utrošku odobrenih sredstava. Kontrolu utroška odobrenih sredstava će vršiti Služba za društvene djelatnosti i poslove mjesnih zajednica u saradnji sa Službom za privredu i finansije.
- Podrška projektima udruženja (ULD Zec, ULD Srednje, PD Bijambare, UR) odobravaju se po pojedinačnim zahtjevima programskim zahtjevima tokom cijele godine i u skladu sa pojedinačnim odobrenjima od strane Općinskog načelnika uz konsultacije sa nadležnom službom. Sa korisnicima odobrenih sredstava sklopit će se ugovor o finansiranju-sufinansiranju odabranih projekata, kojim se korisnici sredstava obavezuju da dostave izvještaj (narativni i finansijski) o utrošku odobrenih sredstava. Kontrolu

utroška odobrenih sredstava će vršiti Služba za društvene djelatnosti i poslove mjesnih zajednica u saradnji sa Službom za privredu i finansije.

Član 25.

Sa korisnicima odobrenih sredstava iz člana 24. stav 1. alineja 3 do 6, sklopit će se ugovor o finansiranju-sufinansiranju odabranih projekata.

Korisnici tekućih transfera neprofitnim organizacijama su obavezni po okončanju projekta ili realizaciji odobrenih sredstava dostaviti nadležnoj službi izvještaj (narativni i finansijski) o namjenskom utrošku sredstava sa odgovarajućom finansijskom dokumentacijom a najkasnije do okončanja budžetske godine, a što je preduslov za dalje finansiranje.

Udruženja kojima se odobravaju sredstva za rad, dužna su dostaviti završni račun ovjeren od FIA (najkasnije do 28.02.), održati izvještajne skupštine do kraja mjeseca maja, i dostaviti resornim službama zapisnik sa skupštine, izvještaj o radu i finansijski izvještaj, odluku o usvajanju izvještaja i program rada za tekuću godinu sa finansijskim planom za tekuću godinu.

U slučaju nepoštivanja odredbi iz stava 2. i 3. Općinski načelnik može svojom Odlukom zaustaviti finansiranje za tekuću godinu, odnosno isti ne mogu biti korisnici budžetskih sredstava za narednu godinu.

Član 26.

Sredstva utvrđena u Budžetu – ekonomski kod 615110 – kapitalni transferi drugim nivoima vlasti realizuju se po odobrenju Općinskog načelnika na osnovu potpisanih protokola, odnosno ugovora ili sporazuma sa korisnikom transfera, odnosno ugovora za izvođenje radova, usluga i nabavke opreme.

Sredstva utvrđena u Budžetu – ekonomski kod 615210 – kapitalni transferi pojedincima realizuju se po odobrenju Općinskog načelnika na osnovu potpisanih protokola, odnosno ugovora ili sporazuma sa korisnikom transfera, odnosno ugovora za izvođenje radova, usluga i nabavke opreme a putem Službe za saobraćaj, stambeno-komunalne poslove i građenje.

Sredstva utvrđena u budžetu – ekonomski kod 615300 – kapitalni transfer neprofitnim organizacijama realizuju se po odobrenju Općinskog načelnika na osnovu zaključaka, ugovora, protokola ili sporazuma, odnosno ugovora za izvođenje radova, usluga i nabavke opreme

Sredstva utvrđena u budžetu – ekonomski kod 615410 – kapitalni transferi javnim preduzećima realizuju se po odobrenju Općinskog načelnika na osnovu zaključaka, protokola ili sporazuma, odnosno ugovora za izvođenje radova, usluga i nabavke opreme

U skladu sa odobrenim programom i potpisanim dokumentom korisnici odobrenih sredstava se obavezuju da do kraja fiskalne godine (31.12.) dostave izvještaj (narativni i finansijski) o utrošku odobrenih sredstava, a što je preduslov za odobravanje u narednoj budžetskoj godini.

Sredstva iz stava 1. do 4. ovog člana mogu se realizovati jednokratno, mjesečno, tromjesečno, polugodišnje, u jednakim ratama, u ovisnosti od priliva sredstava i planiranog perioda realizacije.

Član 27.

Sredstva utvrđena u budžetu 821100 – nabavka zemljišta realizuju se po odobrenju Općinskog načelnika, putem Službe za imovinsko pravne poslove, geodetske poslove i katastar.

Sredstva utvrđena u budžetu – ekonomski kod – 821200, 821300 i 821500, 821600 – nabavka građevina, opreme, sredstava u obliku prava, rekonstrukcije i investiciono održavanje realizuju se po odobrenju Općinskog načelnika na osnovu potpisanih ugovora o nabavci radova, usluga i opreme putem resornih službi.

Član 28.

Prijavu radi iskazivanja interesa za izgradnju i sanaciju infrastrukturnih objekata (putna infrastruktura i komunalna infrastruktura) u kojima je predviđeno učešće građana mogu podnijeti grupe građana ili mjesne zajednice u ime građana za projekte za koje mogu obezbijediti 1/3 sredstava od ukupne vrijednosti projekta.

Sredstva za infrastrukturne objekte u kojima je predviđeno učešće građana mogu se koristiti tek kada sredstva građana planirana budžetom budu uplaćena u korist računa budžeta, odnosno nakon izvršenja uplate može se pristupiti realizaciji projekta.

Član 29.

Postupak nabavke roba, radova i usluga će se provoditi u skladu sa Zakonom o javnim nabavkama („Službene glasnik BiH“ br. 39/14), Pravilnikom o načinu stvaranja obaveza, Pravilnikom o direktnim nabavkama i Planom nabavki za 2024. godinu.

Član 30.

Hitni i nepredviđeni izdaci koji se pojave u toku budžetske godine podmiruju se iz sredstava tekuće rezerve.

O korištenju sredstava tekuće rezerve odlučuje Općinski načelnik.

Budžetsko izdvajanje za tekuću rezervu ne smije prijeći 3 % ukupnih prihoda, isključujući primitke.

O sredstvima tekuće rezerve Budžeta odlučuje Općinski načelnik koji polugodišnje izvještava Općinsko vijeće o eventualnoj upotrebi navedenih sredstava.

Član 31.

Ako se tokom godine na osnovu zakona i drugih propisa poveća nadležnost budžetskog korisnika što zahtjeva povećana sredstva ili se osnuje novi korisnik, sredstva se osiguravaju iz Budžetske rezerve, a na osnovu odobrenja Općinskog načelnika.

Ako se tokom godine na osnovu zakona ili drugog propisa umanje nadležnosti budžetskog korisnika ili se korisnik ukine, neutrošena sredstva se prenose u budžetsku rezervu ili na korisnika koji je preuzeo njegove poslove.

Član 32.

Pogrešno ili više uplaćeni javni prihodi, vraćaju se uplatiocu iz sredstava Budžeta u skladu sa odredbama Pravilnika o procedurama za povrat više ili pogrešno uplaćenih javnih prihoda sa jedinstvenog računa trezora općine.

Rješenje o povratu pogrešno uplaćenih sredstava donosi Općinski načelnik odnosno lice koje ovlasti Općinski načelnik.

III ZADUŽIVANJE I UPRAVLJANJE DUGOM

Član 33.

Općina Ilijaš može stvarati obaveze po osnovu zaduživanja i izdavanja garancija u skladu sa Zakonom o budžetima u Federaciji Bosne i Hercegovine i Zakonom o dugu, zaduživanju i garancijama u Federaciji Bosne i Hercegovine (Službene novine FBiH „86/07, 24/09 i 44/10“).

Odluku od visini zaduživanja i garancijama donosi Općinsko vijeće, a na prijedlog Općinskog načelnika.

Član 34.

Općina Ilijaš se može zadužiti u sljedeće svrhe :

- za finansiranje kapitalnih investicija i posebnih programa odobrenih od Općinskog vijeća;
- za plaćanje, na temelju izdatih garancija Općine, u potpunosti ili djelomično u slučajevima kada zajmoprimac ne isplati svoje obaveze;

Član 35.

Općina može izdati garanciju samo za finansiranje kapitalnih investicija, i samo pod uslovom da je pravna osoba koja je zajmoprimac sredstava pravna osoba čiji je većinski vlasnik Općina ili je pod nadzorom Općine.

Općina vodi popis duga, izdatih jamstava i zajmova, a evidentira ih u sistemu Glavne knjige trezora.

IV FINANSIJSKO IZVJEŠTAVANJE

Član 36.

Općinsko vijeće razmatra i usvaja polugodišnji i godišnji izvještaj o izvršenju Budžeta u rokovima predviđenim Zakonom o budžetima Federacije BiH.

Općinskom vijeću se dostavlja informacija o izvršenju budžeta za period I – III i I - IX.

Član 37.

Služba za privredu i finansije dužna je podnositi Kantonalnom ministarstvu finansija mjesečne i kvartalne finansijske izvještaje.

Član 38.

Komisija za administrativna pitanja, budžet, privredu, finansije i ekonomska pitanja vrši uvid u ostvarenje prihoda i rashoda Budžeta Općine, kao i raspolaganje i korištenje budžetskih sredstava od strane korisnika tih sredstava, prati izvršavanje zakona i akata Općinskog vijeća iz ove oblasti, te predlaže Općinskom vijeću donošenje odgovarajućih mjera za racionalnije korištenje budžetskih sredstava.

V REVIZIJA

Član 39.

Reviziju godišnjih finansijskih izvještaja u skladu sa Zakonom o budžetima u Federaciji BiH vrši Ured za reviziju budžeta u Federaciji BiH.

VI ZAVRŠNE ODREDBE

Član 40.

Za sva pitanja koja nisu regulisana ovom Odlukom, a tiču se načina izrade, donošenja, izvršavanja Budžeta, zaduživanja, duga, računovodstva, nadzora i revizije Budžeta, primjenjivat će se odredbe važećih zakona.

Član 41.

Odgovorno lice budžetskog korisnika, nosilac izvršene vlasti kao i drugo lice odgovorno za izvršavanje Budžeta kaznit će se za kršenje ove Odluke u skladu sa odredbama člana 102. i 103. Zakona o budžetima u Federaciji BiH.

Član 42.

Budžet, Odluka o izvršavanju Budžeta, Izmjene i dopune Budžeta, te Odluka o privremenom finansiranju i Godišnji izvještaj o izvršenju Budžeta objavit će se u Službenim novinama Kantona i na Web stranici Općine u roku od 10 dana od dana donošenja.

Član 43.

Ova odluka stupa na snagu danom objavljivanja u 'Službenim novinama Kantona Sarajevo', a primjenjivat će se za fiskalnu 2024. godinu.

Broj : 01 / 1 - 02 - _____ / 23
Ilijaš, __.12.2023. godine

PREDSJEDAVAJUĆA
OPĆINSKOG VIJEĆA ILIJAŠ

Alma Mešić, BA nov.